



Piitannuaq Angi Alaufesen

UUMMATINNIT ILINNUT

Facebookimi eqqarsaatissiissutinit tigulaakkat

Titartaasoq: Martin Brandt Hansen

Asasara atuartartooq

Inuunermut akersuunnitsinni inuttut nukittunissarput pingaaqaaq. Uangalu tamanna pillugu Facebook aqutigalugu eqqarsaatissiisarsimavunga, misigissutsitsinnik aporfitsinnilluunniit inissiillunilu oqaasinnguisinnaaneq pingaarnertut oqariartuutigalugu. Tamatuma kinguneranik inunnit arlalinnit saaffigineqartarpunga sinnersoqqusunik inuunermillu eqqartuerusuttunik.

Eqqarsaatissiissutikka qujanartumik ikinngutinnit tigulluarneqartarput, arlallillu kaammattortarsivaannga katersorlugit saqqummiuteqqullugit. Taamaatumik aamma Facebookikkut ikiortissarsiorsimavunga saqqummiiniarnissannut aqutissiuussisinnaasumik. Tamatumani Ivalo Egede uummatinnit qutsavigaara saqqummersitsinissannut periarfissamik innersuusimammanga.

Atuartusaaq, illit nammineq aalajangissavat allatannit suut ilinnut iluaqtissatut atorusunnerlugit suullu atorusunnginnerlugit. Tassami toqqagassaqartuaannarpugut inuunitta ajunnginnerpaamik ingerlannissaanut atorsinnaasatsinnik. Namminerpiarlu aalajangertussavarput suut ineriartornissatsinnut iluaqutaasinnaanersut.

*Qujavunga ikiuilaarsinnaassaguma
Piitannuaq*

ASANNINNEQ INUUNIVIT QITERAA



**Ataataaniarpunga qitornannut paasinnittumik
inuuneqarlunga**

Ataatatut inuuniarpunga qitornannik ataqqinnillunga,
ulluni nuannersuni artornartunilu talittarfiujuarniarpu-

nga, qatsunganersiorfimminni anorersuarsiorfimminni-lu tulaffigisinnaajuassammanga.

Ataataaniarpunga qitornannut paasinnittumik inuuneqarlunga, inuunerminnik ingerlatsinerannik ataqqinillunga, ilinniartillugillu killissamik tikkuullugillu inuunermik pilluarnartumik.

Ataataaniarpunga naveersineq kamallu salliullugit inuunanga. Malugitikkumallugu paasitikkumallugulu asanninneq attuinertaqanngitsoq, paaseqqullugu oqaat-sigut sakkugalugit isumaqatigiinnigissutit aaqqinneqar-sinnaasut, paasitikkusullugillu oqaasinnguinnigikkunik qanoq misiginertik paasineqarnavianngitsoq. Ataataajumavunga uummatigissoq, qitornamut ammasoq, sunaluunniit pillugu saaffigissallugu orniginartooq.

Anaanap annianngua

Anaanap annianngua, inuuneq nammineq tigusassa-raat. Inuuneq atukkat illit akisussaaffigilerlugulu, nammi-nerpiarmi aalajangigassaraat qanoq ingerlatissanerlu-gu.

Inuunermili akersuunnerni aqqudit imaannaanngit-tarsinnaasut naapitassaasinnaasarput, taamaattoq inuunerup nuannersua tammanngisaannarpoq pillu-arnerlu nanissaajuassavoq. Asanninnerlu tammanngi-saannassavoq.

Ikinngutinnguara, inuunerup qaamasoriuarpaatit, il-lillu tamanna qaammarissartuassavat ikummarissartu-arlugulu.

Qujamasunnera killeqanngilaq

Asanninnerpit kipilerfigisama misigeqqinnissaa qila-naarlunga utaqqivara. Ilinnut qujassutissaqartuartunga, ilaanni oqaatsit sapigaannik, taamaattoq qujaniarnera killeqanngilaq اساسا, اساسا, asanartuuteqarfiga.

Anaanat ukorsii

Anaanat tamassi, anaanat ulluanni pilluaritsi. Qujanaq qasusuillusi, ilaatigut naammagittarlusi, piffissaq an-nertooq meerannguassinnut atortarassiuk. Ataqqinaati-gaarsi asanninneri meeqqassinnut. Ammasuunissi or-niginartuarnissilu takutippaat qanoq asaneqartiginersi.

Uummatasi ammatissigut naveersinerlu peerlugu kaammattuininngortissiuk, qanorluunniit atugaqaralu-arfimmi saaffissaajuarniassagassi. Ulloq atorluarisiuk.

Asanninneq inuup pinngorartitaraa

Asanninneq inuup pinngorartitaraa, asanninneq immi-nut allanullu pingaaruteqarpoq nunarsuarmilu inuit ta-marmik asanninnermik peqarput.

Nunarsuarmit uumassuilinni tamani asanninneq pi-uvoq. Taamaammat uumasogatigiit imminnut asaqati-giillutik ikioqatigiikkaangamik nukik annerpaaq piler-sittarpaat.

Inulli tassaasorisarpara asannillaqqinnerpaasin-naallunilu ajornerpaasinnaasoq. Uagut inersimasut tassaavugut meerartatta qanoq perornissaannut apeq-qutaalluinnarqissaartut. Meeqqat namminneq ilikkar-tanngimmata inersimasut meeqqamut avatangiisusut meeqqamut immersuisuummata.

Uanga peqqunittuut pissavakkit

Asanninnera erlinnartuutigaara, timiga asanersaallugu, pisimasut qujamasuutigalugit perorsarneqarneralu akueralugu.

Uanga peqqunittuut pissavakkit. Inuuninni kinaassu-sersiorniangilanga, minnerutitaqarnangalu anneruti-taqarnianngilanga, nalunnginnakku tamatta naleqassu-serput assigiittoq.

Ilisimavara nunami maani atugassat ilaat imaannaan-ngitsuusut, taamaattoq nikallorsaatiginianngilakka, inuunerup pilluarnartua qinertuassagakku.

Pisimasut akueraakka, uummatinni issapput assilis-satut, atorsinnaangitsut qassiiliuutigalugillu kinguar-saatiginianngilakka.

Inuuneq periarfissarpassualik nuannareqaara. Inuu-neralu qaamasuusoq tullinnut qinngorsimatittuarniar-para, asanninneq tunaaralugu.

Maqaasinerup asanninnerup angingaassusaa takorluulersikkumaarpaa

Asasigut asasagut utoqqaliartortillugit qujamasuttarpu-nga inuuninnut sunniutilimmik asanninnermik tunisi-sarsimmata. Maannalu inersimalersimagama allatut ajornartumik qamuuna piareersartarpunga asanninneq tunniunneqarsimasoq pillugu nangitsinissara akueris-riaqarlugu qaqugu ullut tamakku nalliuppata. Qujama-sunnermik qulliit kuukkumaarput, maqaasinerup asan-ninnerup angigaassusaa takorluulersikkumaarpaa, qu-janaqaarlu inuuneq ingerlaqqittuarmat.

Illit inuuneq uannut tunniukkakku inuuninni asan-ninneq tunniussat ingerlateqqissavara, nakooqqutigis-savaralu. Neriorsorpakkit inuuninni tamanna ineri-ar-tortittuassallugu.

Inuunermi asanninneq tamanit toqqissinarnerpaavoq

Inuunermi asanninneq tamanit toqqisinarnerpaavoq, pingaartumik oqaasertalerlugulu timitalersorluarsima-gaanni. Asanninneq attuinerdaqanngilaq, qinngarsui-nerdaqarani immikkoortitsinertaqaranilu. Inuunermi

kaammattuineq aqqutissiuinerlu naveersinermit kinguneqarlu-arnerpaasarput, inuummi pi-sariaqartippaa inoqammi-nut attaveqartuarnissani, namminermilu kukkussutit takujuminaassinnaasarma-ta toqqissisimasumik oqar-figitilaartarnissaq pisaria-qartillugu. Kukkujuitsuun-gilagummi.



Asanninneq qaammaqqutigalugu

Mallit qaartarusaarput timmiannguillu qitivipput, kuunnguit mamarunarluartut koorujoorput seqernup kissarnerata timera kissatsikkaa, taakku tassaapput aasamut qilanaarutima ilaat. Taamaattoq ukioq tikillu-aqqunarsigit, nunami qaammarpoq, juulli, ukiortaaq aammalu seqinersuup qummut aallarfissai, qilanaarlu-

nga utaqqissavassi. Uummatip ilorpiaani asanninnera qaammaqputigalugu inuuneq ingerlallara, inoqat asal-lugu.

Asanninneq minguitsuuvoq

Inuunermi asanninnermik paasinninnissaq tamatsinnut pingaaruteqarpoq. Asanninneq ima ataqqinartigalunilu angitigaaq tassaalluni kaammattuineq, tapersersuineq, tatiginninneq, qanilaarneq ataqqinninnerlu. Asanninneq timikkut tarnikkullu annersitsinertaqanngilaq. Asanninneq naveersinertaqanngilaq kaammattuineru-gami. Asanninneq pasipiluinerataqanngilaq. Asanninneq inoqammik immikkoortitsinnngisaannarpoq.

Qitornannguasi paarilluartuarniarsigit

Asasakka angutit arnallu, qitornaqarusi qitornanngu-asi paarilluartarsigit kaammattorluarlugillu. Ilissimi angajoqqaatut akisussaaffigivarsi qitornannguasi kat-sorsagassanngorlugit perortinnnginnissaat. Taamaamat meerartassinnut piffissaqarluartaritsi.

Asannittup asasani erloqisittarinngilaa

Asanninneq pillugu erloqissuteqarusi taava asanninneq tatiginninnermik ilalersimanerlusiuk imminut aperi-gitsi. Asasasi tatiginariarsigit, asasasi kiffaanngissuse-qartissigit asasasilu kinaassusiiqinasigit. Asasasi nale-qassusiiqinasigit asasasilu pasipiloqinasigit. Asasasi iluatiginerloqinasigit asasasisaaq nikassaqinasigit.

Asannittup asasani erloqisittassinngilaa, anniarti-tassinngilaa, akerlianilli tatigalugu tapersersortarpaa asasaq nalilittut isigineqartarmat.

Asanninniarsariinnarlusi asanneqinasi, nalunngivil-lugu inuunerlutsitaallusi, ersiortitaallusi, kiinarpaler-sortarlusi. Taamaassimappat inuunermik paasinnittaas-ersi eqqarsaatigeqqittariaqarparsi, inuunissinnimi taa-ma sivikitsigisumi pisariaqanngilaq erloqisitaaginnavil-luni inuunissaq.

Asanninnermik inuunermillu avitseqatiginnga

Asannga, asanninnermik aamma uanga tuniorassavak-kit isummannillu avitseqatigisannga, uangattaaq atuk-kannik avitseqatigissavakkit.

Inuunermi asanninneq ernumassutigeqinagu, asan-ninnerup qimanngisaannassammatit. Asanninneq ilin-niittuartoq ajattoqinagu, alliartortigulli ilinnut avam-mullu.

Sunaluunniit angusinnaavat pikkoriffeqarputillu. Im-minut miserratigalutit sianiitsuunerartarnak, piumagu-it sapinnginnavit.

Asanninneq ineriartortitassaavoq

Inuunermi asanninneq ineriartortitassaavoq. Inoqam-mut asanninneq ilinniagassaavoq inuuneq perorsagaa-neq aallaavigalugu toqqammavilerneqartarmat. Naapi-tanit atorsimasat oqitsuinnaasannngimmata isumakkee-rinninneq inuunermi aamma ilinniagassat oqimaanner-saraat. Imminut asaleruit allanut asannillaqqississaatit,

imminut tatiguguit allanut tatiginninnerussaait, imminut naleqartikkuit allat nalilittut isigissavatit.

Ikinngutinnguara, suna tamarmi ilinnit aallaaveqarpoq asanninnerlu toqqammavigalugu ingerlaguit siunissat qaammannerungaassavoq.

Asanninneq naammatsillugu pineqarsinnaangilaq

Nunarsuarmit asanninnermik paggatsikkutsigit qaarsillassapput, taamaattorli nutaamik perusutuaannassapput.

Asanninneq ullut tamaasa pisariaqartippaput, qungjunnermilluunniit tunisineq inummup isumalerujuvoq, taamaattumik qungjunnermik aamma tunisisarit.

Uummatiginneq asanassutsip aallaavigaa

Asasara ikinngutiga, nunami maani timit akuerisariaqarpat qanorluunniillu isikkoqarpat nuannaarutisaraat.

Ilaanni misigisarputit pualavallaarlutit, imminut narrugalutit, pinniigalutit, tamakku inuunerup asanassusianut takussutissartaangillat uummatiginneq asanassutsivit aallaavigimmagu.

Illillu nalusarpat pinnissusermik qanoq atsigisumik peqarnerlutit, inuppassuimmi nalusavit pinarisaraatsit naluinnarpat.

Tamanilli pingaarnerpaavoq asanninneqarnissaq imminut allanullu, taannaammak asanassutsimik

pilersitsisartooq ileqqorissuserlu asanarnerulersitsisaromat.

Aappariinneq ikioqatigiiffiusussaavoq

Angutaanerit pissutigiinnarlugu qanga arnat suliassaattut isigineqartartut ilaaginnarlugit isiginneqinak. Illit



sussa taamaaqinak, aappariilluni sutigut tamatigut avitseqatigiittarneq peqqinnarnerpaavoq.

Illup iluani aappariinnermilu oqaloqatigiittuarneq avitseqatigiittuarnerlu tamanit peqqinnarnerpaavoq, iluinnaasiortumik inuujumangikkaanni.

Qamuuna iluaalliutigiinnarnagu isummatit tusartit-takkit, tamanna aappariinnermut peqqinnarnerpaavoq.

Asanninneq ikualajuartuovoq

Asanninneq pigiliussimasarput innertut ikualajuartuovoq, ikummarissartarutsigulu asanninnermik angingaartumik avammut ilumullu qinngorsimajuartumik peqangaalissaagut. Asaqqugussi asannigitsi, asaneqar-nissarsi kisiat utaqqinagu, asanninnerup taava qimanngisaannassavaasi.

Asanninneq ilinniartuassavakkit

Asanninneraa ilinniartuassavakkit inuunera tamaat toqqammavigiuassavakkillu qanoriliuuseqarninni. Ingerlateqqissavakkit qitornannut, toqqissinarnerit, pil-luarnarnerit nakussatsitsisarnerillu pillugit.

Ilisimavara qimannaviangikkimma qanorluunniit nikallungassuteqaralaruma, inuuneralu tamaat pisa-riaqartittuassavakkit.

Asannikkuma asaneqarumaarlunga qularinngilara, asannittumik iliornigut tamarmik uatsinnut utertarmata.

Imminut qiviarsinnaanivit nukittortissavaatsit

Asanninneq inuunermi nakooqutigaat, imminut qiviarsinnaanivit ineriartortissavaatit, inuunermik takun-nissinnaanivit imminut ineriartortittuassavaatit.

Imminut tatiginivit, imminullu naleqartinnivit mali-gassiuisinnaanerit annertusassavaa, oqaasinnguisin-naanivillu paasineqarnerunissat aqqutissiutissallugu.

Ikinngutinnguara, inuuneq illit pigaat, inuunerullu nuannernerunissaa illit akisussaaffigivat.

Asagit, asasivit asavaatsit, asannikkuillu asaseqarlu-
arumaarputit.

IMMINUT NALEQARTIGIT


Ajunngitsumik isumaqaruit ilerasoqinak

Pilluaataavutit, nukittoqutaallutit pilersittakkatillu nuannaqaat. Ineritittakkatit sunniuteqartuartut malugineq ajukkatit nuannaarutigisarpagut, taamaammat imminut suunngitsutut isumaqarfigeqinak. Inuuniliutiin-narsimasannik malugineq ajukkannik iliutsitit sunniuteqarnerillu qujamasuutigisarpagut. Inuunerup qaamanaaatit inuunerit qaammarissartuarniaruk, illimmi inuuneq ikummarissartussaavat. Inoqatitit illit pillutit eqqarsarteqinagit, illimmi ajunngitsumik isumaqaruit ilerasuutissaqanngivipputit.

Imminut aallaavigalutit ingerlagit

Maannamut takorloortuakkatit aatsaat piviusunngorsinnaapput qanoq iliuseqarfigigukkit, taakkulu illit nammineq imminut aallaavigalutit ingerlakukkit pisinnaasatit qaangernagit illussaaitit.

Inuunerup takutittarpaa qanorluunniit ilungersualluni inuusimagaluaaraanni inuuneq oqinnerulersinneqarsinnaajuaannartooq, taa-



maattumik illit inuttut nammineq apeqqutaavutit inuunermi atukkanni qanoq inuussanerlutit.

Asanninnerup nunami maani qimannaviangilaatit.

Illit inuuneq pigaat

Ikinngutiga, illit inuuneq pigaat. Sunaluunniit sunniuteqaqataaffigisinnaavat ilinnut attuumassutilik. Inuuneq atukkat ilinniarfigiuk, ineriartorfigiuk, aporfiit ajugaaffigikkitt. Inuuneq misigisaqarfissaavoq, inuuneq tamatta immitsinnut akisussaaffigaluta ingerlattussaavarput, taamaattumik inuunerit illit pigaat.

Uummatit asanninnermik ulissimasoq atorluaruk, asanninneq utertuartarpoq, asannikkuit asaneqassaatit, asannigillu tamatta asanninneq pisariaqartipparput. Inuk inuutilluni asaseqartuartaussaavoq.

Imminut nalligeqinak inuunermut akiuuttuarit

Imminut ataqqillutillu imminut naleqartittuarniarit, ilimmi qanoq iliuuseqarnikkut imminut siuarsartuarsinnaagavit. Pereersimasut inuuninni inituallaarteqinagit, ullumikkut ulloq nutaajummat. Pereersut ilinniutigikkitt aaqqitassartaalu inissillugit. Inuuninni imminut nalligelernak inuunermut akiuuttuarit. Misilittakkatit pillugit imminut nikanartittarnak, qanorluunniit inuunerlussimatigaluaaraanni inuuneq qaamanermut saatinneqarsinnaavoq inunnut tamanut iluaqutissanngorlugu.

Eqqaamajuaruk illit nalusannik allat nuannaralutillu asajuarmatsit, ujarlerit nassaassaatit taava.

Illit nammineq inuuneq akisussaaffissaraat

Inuuneq illit nammineq akisussaaffigaat. Akisussaaffimik ilinniarnermi akimmiffissat amerlasaqaat, taamaammatt sorsugit, imminut naammagisimaarneq, pil-luarneq imminullu asaneq tikitslerlugit. Illit siunnerfiit, qanoq inoorusunnerit inooqateqarusunnerillu eqqartueqatigiinnikkut siunnerfilersuuk. Sinnattutit takorluukkatillu piviusunnngortikkusukkukkit periarfissaqartuarputit, atorluaannakkitt.

Kukkujuissutsip silarsuaani inngilagut

Inuuneraa, pilluaatigissavakkitt qanorluunniit akimmiffissat takkuttaraluarpata. Inuuneraa, ilinniarfigissavakkitt nalusannik tamanik. Ullut suusut siumut takusinnaannginnakkitt qujasarpunga, taamaattorli imminut neriorsorpunga nikallorfiginagit akiortuarniarlugit. Inuunerup sumiluunniit atortitaani kukkussutikka isumakkeerfigaakka isumakkeerfiginngalu kukkunikka pillugit. Kukkujuissutsip silarsuaani innginnatta maani.

Avitseqatiginnerup inuuneq qaamarsassavaa

Inuuneq manna inerititaqariartorfiuvoq, imminut ineri-sarfiuvoq kiisalu inuunermik ingerlatitseqqinnissamik periarfissaliisuuvoq. Tamatumani asanninneq pingaartupilussuuvoq taamatuttaarlu kaammattuineq. Kialuunniit inuup inuunermini qaamanertut ikummarissarneqartuarnissani pisariaqartippaa. Illillu inoqatinnut ikiueqataasinnaaqqullutit maani nunamiipputit sumiluunniillu ikkuit aamma nammineq ikiorneqarsinnaallutit.